



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 6

Yangia anidakangma :

Tir Yimiyim

tiryimiyim@aolima

tir yimiyim

TAPAK 3

Mizoram nung tanur ka dena kibong ajunga anenset

CBI-i Arvind Kejriwal apuba atema Delhi high court-i telangzüba meshir

VOL. XXI ISSUE NO. 261 (ADOK 261) DIMAPUR RASEMNÜ (WEDNESDAY) CHITENI (JULY) 03, 2024 ₹ 5.00

Miss Universe India 2022 nung state nungi Ruopfuzhano Wisho tokteptsü



Mongulbarnü Zone Niathu by The Park, Chümoukedima nung Miss Universe Nagaland audition agiba sülen tangokba noksa ka nung Ruopfuzhano Whiso den tetendanger aser BASN ketdangsürtem angur.

Dimapur, Chiteni/July 02

(TYO): Miss Universe India 2024 tetoktepta nung Nagaland state tenung nung arishi küm 25 tain Ruopfuzhano Whiso-i shilem agitsü. Mongulbarnü Zone Niathu by the Park, Chümoukedima nung Miss Universe Nagaland atema candidate 19 tendanga sülen la shimteta liasü.

Iba audition sülen Beauty and Aesthetics Society of Nagaland (BASN) tir Mele Pucho-i osangbener den jembidang, Miss Universe Nagaland audition ya Nagaland nung tang mezüingbuba agi aser taküm küm nungibo national level nung indang-indanga oa tokteptsü atema candidate parnokki shimtsü, ta ashi.

Audition atema state nung district balala nungi candidate 19 arua liasü, ta pai metetdaksü.

Iba audition nung tetendanger tem ya Asmita Chakraborty, Miss Tourism India 2023, aser Amjad Khan, Director of Operations and Marketing of Miss Universe

India liasü.

State shia nungi audition nung shilem agitsü mechi yimti balala 28 aser Union Territories nungi audition ana agitsü telemtepta agi, ta Amjad Khan-i ashi.

State shia nungi shimteta candidate tem ya national level nung shilem agitsü aser parnok rongnungi nisung ka Miss Universe India 2024 atema shimtsü aser laji India tenung nung November ita Mexico nung Miss Universe pageant nung oa tokteptsü ta pai ashi.

Hopta asem Miss Universe India pageant ya August ita tasembuba hopta nung tenzüksü amai lir, kechiaser iba tetoktepta ya September 10 matongdang tembangsüla, kechiaser Miss Universe nung tokteptsü asoshi renemshitsü ita ana mapang agitsüner, ta ashi.

Miss Universe Nagaland nungi top five contestants ya Ruopfuzhano Whiso, Kenei Ritse, Vimgha Sheqi, Keziah Mero aser Tsiawavi nungertem liasü.

Criminal Law benoktsü atema Nagaland Police-i jenjang agiogo

Dimapur, Chiteni/July 2 (TYO): Criminal Law tasentem benoktsü atema Nagaland Police-i July 1 nü jenjang balala agiogo. Nagaland Police unit ajak dang jelia item ozüingtem benoka inyaksangshitsü aliba Investigation Officers tem training agitsü tetuyuba agüja liasü.

Kasa mapang nung nüburtem nem parnok oshi nung ozüing tasentem indang tangazükba agitsütsü atema ozüing tasenba asem; Bharatiya Nyaya Sanhita 2023 (BNS), Bharatiya Nagarik Suraksha Sanhita 2023 (BNSS) aser Bharatiya Sakshya Adhinyan 2023 (BSA) nung tongtibang

onüktem oshi balala nung meyipzüksü atema jenjang agi liasü.

Iba dak sendakba nung Nagaland Police unit temi Police Station level, kiyong balala, kaketshirtem, NGO tem aser yimtsüing nung yimtsüyimbo tem atema seminar ayongzüka katsüogo.

Maneni Pamphlets aser documentary material tema lemtsüogo aser jila balala nung local oshi nung zülur banner tem mesanga tokja liasü. Lokti nung tongtibang stakeholder tem ajak anisemtsü aser longjemer inyaksü atema iba jenjang agiogo.

NDPP-BJP sorkari Class X kaketshirtema meyutsür

Dimapur, Chiteni/July 02 (TYO): NDPP-BJP teloktep sorkari Class X nung azüingba kaketshirtema anüingzüka meyutsür. Meranga azüingba kaketshirtem yamaji amshiba tatishitsü tejangja kaji, küm ka süyia HSLC examination 2023 nung top 50 jenjang ngutetba kaketshirtem tang tashi Chief Minister's Meritorious Students' Fellowship (CMMSF) mangur, ta Rising People's Party (RPP) ajanga Mongulbarnü sangdong ka nung ashi.

Küm shia CMMSF sentong agidang top 50 nung aliba kaketshir shia nem Chief Minister-i sen 50,000 amoktsütsü protocol nungbo shia lir. Ajisüaka CMMF sentong agitsü atema telemtepta agitsü

tashi aliba Chief Minister's Office (CMO) ajanga küm ka jungaka tang tashi telemtepta magiteti lir ta NBSE/DoSE nungi osang kar angazüka kanga aoksar aser süngmanger, ta ashi.

Kaketshir aser parnok tsürabortem senotsü bushia senzütepda克斯, aser iba mapang CMMSF tentetba nüingdak mali kumdaksür, ta RPP ajanga ashi.

Jenjang tajung nung takok anguba kaketshir nem agitsütsüba sen ya CMO ajanga danga lenmang kar nung amshia alitsü südi ta RPP-i angateter.

Iba 'adjustment' yimya ya tang tasen masü. Post-Matric Scholarships atema otsü kasa dang. Küm shia state indang Higher Education Minister-i mapang

shidak nung Post-Matric Scholarship lemstütsü nangzüker, saka pai küm shia iba sen agitsüba nung menur aser küm shia scholarship menur agitsüba atema tamagitsü kuli agitsütsü maker, ta RPP sangdong ajanga ashi.

NDPP-BJP coalition ya tembar tajung/kinunger tem ajangzüka construction sector dak alaka education sector mesüra danga sector temulung agüja tekeraba nung inyaksü mangdang maka, ta ashi.

NDPP-BJP ajanga sen crore 52 indoka Kisama nung rostrum tasen yangluba ama 'vanity projects' tem nung temulung agitsü tashi shisaliok tajung malitsü aser kaketshirtem maneni timtemtsü, ta RPP sangdong ajangasa ashi.

DMC züingsemtem senden July 5 nü amentsü

Dimapur, Chiteni/July 02 (TYO): Municipal Affairs Department, Nagaland Civil Secretariat, Kohima ajanga shiti züluba ama aser Nagaland Municipal Act 2023 indang Section 12 (3) aser Section 23 kübok tashi agüja alima amshia, aser State Election Commissioner (SEC) ajanga Official Gazette nung elections results adoktsür asünung, Dimapur Municipal Council

nung Elected Members tem senden ka July 5, 2024 anüingdang 11:00 ako nung amentsü, ta Deputy Commissioner, Dimapur, Dr. Tinojongshi Chang, NCS ajanga sangdong ka nung metetdaksü.

Nagaland Municipal Act, 2023 indang Section 60 A nung aliba ama Oath of Affirmation agitsü atema iba senden ya Deputy Commissioner, Dimapur indang Conference Hall nung

amentsü.

Iba sülen Nagaland Municipal Act, 2003 indang Section 12(3) aser 23 nung shia aliba ama Dimapur Municipal Council nung Chairperson aser Deputy Chairperson shimtsü, ta sangdong ajanga ashi.

Anungji Elected Members ajak iba senden nung medema arua adentsü ayongzüker, ta DC Dimapur sangdong ajangasa ashi.

Tzünglu medangi aruba ajanga Chessore temeket nung timtem adoka lir



(Abelen) Tzünglu kanga sashia aruba ajanga ali yimzüka oa Thusangki River, Kiphire nung July 2, 2024 nü tzülu raksatsü. (Achichi) Chessore area, Shamator nung July 2, 2024 nü tzünglu kanga sashia aruba ajanga tzülu raksatsür aliba noksa nung angur.

Dimapur, Chiteni/July 2 (TYO): Tzünglu medangi aruba ajanga Shamator kübok Chessore temeket nung nüburtem tzümetsüing aser anentsüh aluba agi timtemtepar.

Chessore- Huker- Y. Anner valley koba dang Yimkhiungrü nung indang 'Rice Bowl' ta ajar, iba tesem ya tawa kanga mejungi kongshio. Huker yimtsüing, Chessore yimtsüing aser Y. Anner yimtsüing kübok tüzak ya Yimkhiungrü nungertem atema Cannan ama temo aketba lima ta züingshir, ajisüaka iba tesem ya April 19 nü nungi kanga mejungi kongshir lir, kong tzülu shilem 60 bo tzü agi aponger oatokogo, ta village council-i metetdaksü.

Maneni June 30 nü nungi ano

tzünglu kanga aruba ajanga tzülu tanungba ajunga apongerogo aser Langa-ke ayong nungi Chessore ayong tashi nung tzülutem tzümetsüing agi kanga mejungi raksatsüogo.

Tzünglu aruba ajanga anentsüha tesem aika nung alua tesem balala nung lenmangtem aika nokdangogo. Tuensang nungi Shamator tashi Y. Anner yimtsüing aser Shiponger yimtsüing süia aoba lenmanga, koba Chessore temeket nung alirtem metaloker aliba lenmang ka lir iba lenmanga kanga mejungi kongshio.

Müksük-Ke apu koba MNERGA fund amshia Chessore yimtsüing yanglua liasü, iba apu techireper dang lir. Shiponger

asur Leangkonger na tsüingda apu koba PMGSY kübok yanglua liasü, iba apua kanga mejungi raksago.

Kasa mapang nung Y. Anner yimtsüing village council chairman-i ken o dak sendaka aliba department tem dang lendong agi kongshir aliba nüburtem nem teyari agitsütsü mepeshia metetdaksüogo. Chessore yimtsüing Council Chairman Zhelo-ia, District Administration, NPWD, SDRF aser ken o dak sendaka aliba department ajak dang Chessore temeket nung aliba nüburtem nem teyari agitsütsü, aser anentsüh agi lenmang nokdang aliba merektetsü mepeshia metetdaksüogo.

Imlisanen Jamir, ULB election nung takok anguba asoshi tenüngsang agütsüba sentong aka



Imlisanen Jamir, ULB election nung takok anguba asoshi tenüngsang agütsüba sentong nung tangokba noksa angur.

Mokokchung, 2nd July (TYO): Mokokchung Municipal kübok Ward No. 17, Mongsenbai nungi NDPP ticket nung adoksang Mokokchung Municipal Council, Member Elect, Imlisanen Jamir, ULB election nung takok anguba nüngtem tenüngsang agütsüba sentong ka Mongsenbai Yim Ki nung ayongzüka kaogo.

Pai iba sentong nung jembidang, iba election nung adokba ya pa ajungba agi masü saka Tsüngremi yariba den Mongsenbai ward nüburtemi

yimli tulu sayua angati vote agütsüba ajanga takok tulu ngutetogo, anungji, Mongsenbai sanger dang pelaba metetdaksü.

Talisa Nagaland RD & SIRD Minister, Metsübo Jamiri pa dak temulung lemteta pa nem party ticket agütsüba den NDPP Mokokchung region, 27 A/C NDPP, Mongsenbai Unit NDPP, Longsa aser Yimjenkimong yimden, Longsa aser Yimjenkimong Senso Telongjem Mokokchung, Mongsenbai yimden, election

mapang tongpu apua yariteper, medemertem, kinunger aser nübu, shisatsü, rongsen aser sarasadem agi yariteper ajak pelaba paisa metetdaksü.

Pa election-i aitsü sangdongba anogo nung pai koba mangdangtemsa lemsatepogo, item ajakji Mongsenbai yimden aküm nung nübur taginüba ajiteta inyakyonga aotsü terenemba lir, anungji, nüburtem nungi maneni amalitep aser teyaritep nungdaksü, ta paisa mepishia ashi. Meimchirji shinga tabensaba mali, anungji, nenok nungi temetongshitsüba den sarasadem aser shisatsü akanger, ta paisa ayongzüka.

Sentong nung Mongsenbai yimden, Mokokchung Region NDPP, 27 AC NDPP, Mongsenbai Unit NDPP, Mongsenbai Unit Women Wing NDPP, Imlisanen Jamir indang Chief Agent Chubatoshi, Kidong aser kinungertem nungi meyongertemi tepela o den tayongzüka o tulu shia tesentepertem ayongzüka.

Kumlong Baptist Arogo, Assoc. Pastor, Dr. R. Zulu Jamir den temoatsü meshia sentong tenzüker aser Mokokchung Compound Baptist Arogo, Pastor, Lanuwati den tenüngsang agüja sarasadem sentong tembanga liasü.

Ward tekuprong longjemer inyakdi : L. Moatemjen



L. Moatemjen

Dimapur, July 02, 2024 (TYO) : Tawa tembanga ULB election nung Lukongmendang Ward Tuli nungi BJP candidate, Wb. L. Moatemjeni takok tajung anguba sülen yashi July 01, 2024

nü Lukongmendang Ward Community Hall nung tenüngsang agütsüba sentong ka ayongzüka liogo.

Yipru mopung tesashi ama khuret aser timtema balala aruogo saka tetenzükdang nungi tatem tashi bendanga agütsür yaritepba atema mezüngbuba kiyongertem dang kanga pelar, ta iba sentong nung jembidang Moatemjeni metetdaksü.

Tenüng tetshia meshiaka talang nung alirtem aser ana nung alirtem shirnokisa inyakyim balala nung nübu, rongsen aser shisatsü agi yaritepa aruogo, parnok ajak dang kanga pelar, ta paisa nenshia ashi.

Tashimaitba taküm ka asünung maparen balala inyaka aodang nungita yaridaksüner, ta Moatemjenisa mepishia metetdaksü.

Tuli Town Council kübok ward balala teku (9) nungi takok angurtem nem pai tenüngsang agütsü aser parnoka iba sentong nung densemba atema pelaba lemsatepa liasü.

Ward tekuprongji Tuli purtem atema dang asünung, ajak külemi longer inyakdi, ta Moatemjenisa ward balala nungi takok angurtem ajungshia metetdaksü.

Imlirenba Longcharii iba sentong ketdangsüa agi aser S. Imti Jamir PRO; State General Secretary, Kissan Morcha BJP Nagaland, Imnanungsang Lemtor; Chairman, Lukongmendang Ward Committee, C. Temjen Ltr; Asetkong Telongjem Tuli; Longjang Senso Union Tuli; aser S. Sendong Ao nungertemi iba sentong nung tepela o aser tayongzüka jembia liasü.

Dimapur nung mejangjaba tasü mang ka nguteta lir

Dimapur, Chiteni/July 2 (TYO): July 2 nü District Hospital nungi doctor kati July 1 nü tebur ka temang mejungi anir arua mozükidang toktsüba temang aneplauba mapang süatokba indang osang East Police Station, Dimapur nem phone ajanga metetdakja liasü.

Osang dak ajemdaker East PS duty party mozükidangi oa liasü. Osang ajanga ashiba agi, Rail Bazar, Dimapur nung alir asür Biswanath'er jabaso arishi küm 50 tain Dharm Das July 1 nü District Hospital, Dimapur-i anir aru aser male ward nung admit asü, ajisüaka pa July 2 nü 5 ako shi nung süatok. Pa

temesen aser Anaemia tashidak agi asü. Ajisüaka pa tasü mang shingaia bener mao. Tasü mang dak sendakba nung bushisü dang süogo.

Maneni temzüng ozüng kübok tinyatsü maparen ajak tembanga inyakba sülen tasü mang ya maitsü jangjatsü atema District Hospital morgue-i benerogo.

Ken o dak sendakba nung asüsanger kinunger aser medemertem dang Officer-in-Charge, East Police Station, Dimapur (Mobile No. 7085055020) den tongteprateptsü mepeshia metetdaksüogo.

Lions Club of Dimapur Japfu installation sentong agiogo



Kohima, Chiteni/July 2 (TYO): Lions Club of Dimapur Japfu-i ayongzüka July 1 nü Lionistic Year 2024-25 atema Board of Directors tasen amenokba sentong agiogo.

Region chairperson (Region-8) Lion Sumita Sharma-i achayanga, Installation officer ama installation ceremony agia liasü.

Iba sentong nung VDG2 Lion Dr. Neena Dutta alakteta jaoker aser Lion M. Gojendra Singh PDG, SCA, (District Advisor-1) tetushi tejaoker liasü.

Pai, Lions Club of Dimapur Japfu züngsem tasentem anioka liasü.

GMT District Coordinator -2 Lion Shankar Rauth-i, club

tasenba, Leo Club of Japfu Dimapur (Sponsored by Lions Club of Dimapur Japfu) indang PTS züngoksema liasü.

Lions Club of Dimapur aser Lions Club of Dimapur Blue Venda nungi züngsemtem kari iba sentong nung shilem agi.

Sentong nung Lions Club of Dimapur Japfu nungi züngsem 26 pronglai shilem agia liasü.

Sentong ajunga ya VDG-2 Lion Dr. Neena Dutta-i achayanga agi.

Lions Club of Dimapur Japfu nung tang shimba PST tem rongnung Tir- Lion Merennungsang Ao, Secretary-Lion T. Bendaghlila aser Senyur-Lion Kamalendu Das nunger densema lir.

Bhandari nung Criminal Law tasenba indang seminar agi



Dimapur, Chiteni/July 2 (TYO): Wokha Police tawabangba kübok Bhandari Police-i achayanga July 1 nü Police Station Bhandari, Wokha nung police jawan tem atema Criminal Law tasen asem dak sendakba nung Awareness Seminar ka ayongzüka katsüogo.

SDPO Bhandari, Vekato Chishi aser UPI Bendangsungba Jamir, OC Police station, Bhandari nati sepaitem nem tangazükba balala agütsü aser ashiba agi, Criminal Law tasen asem ya July 1, 2024 nü nungi beshi tenzüksü, aser iba ajanga British nunger yimsüsüba mapang benokba Criminal Law tem melentsü.

Ketdangsür ana yagisa, Criminal Laws asem; "The Indian Penal Code (IPC), Code

of Criminal Procedure Code (CRPC) aser "The Indian Evidence Act" ya "The Bharatiya Nyaya Sanhita (BNS) 2023", "The Bharatiya Nagarik Suraksha Sanhita (BNSS) 2023", aser "The Bharatiya Sakshya Adhiniyan (BSA) 2023" agi melenogo, ta metetdaksü.

Ozüng tasen asem indang provision tem indang jembiba mapang ketdangsürtemi, iba ozüng tasen asem aser ozüng inyakyim indang jangja alitsü koda tongtibang iba indang lemsatepba den, ozüng tasentem kanga junga angatetba ajanga kanga junga renema atatetsü aser sepaitemi ozüng kanga junga benoka inyaksangshitetsü aser iba dak ajemdaker ken o aser tensa aziöktetsü, ta ashi.

NAGALAND POLLUTION CONTROL BOARD
Signal Point, Dimapur - 797112, Nagaland
Tel.: 03862-245727, TeleFax: 03862-245726
Website: www.npcb.nagaland.gov.in e-mail: npcb2@yahoo.com

AMBIENT AIR QUALITY FOR KOHIMA AND DIMAPUR CITY
KOHIMA ASER DIMAPUR NUNG MOPUNG MERÜK-MEMERÜKBA JENJANG

Sl. no	City	Location of air station	Type of area	Monitoring dates			Permissible limit As per the National Ambient Air Quality Standards "Iba tasazük alemabo metudaksütsüla"
				25.06.2024	27.06.2024	29.06.2024	
1	Dimapur	Bank Colony	Residential	53	40	46	100 µg/m ³
2		Dhobinala	Commercial	117	110	104	
3		NPCB Office, Signal Colony	Residential	32	27	49	
4		Tenyiphe, Chumoukedima	Commercial	45	54	58	
5		Nagarjan	Residential	27	29	21	
6		Viola colony	Residential	37	28	21	
7		Burma camp	Commercial	71	70	59	
8	Kohima	Opposite NST Office	Residential	15	56	52	
9		PWD Junction	Commercial	21	58	48	
10		High School Junction	Commercial	57	53	64	
11		Midland (Upper)	Residential	15	52	40	
12		Forest Colony	Residential	19	51	58	

Iba osang ya nüboritem ajangzüksü atema Nagaland Pollution Control Board-i agütsür.



State Legislative Council by-polls atema Patna nung NDA candidate Bhagwan Singh Kushwaha-i nomination agütsüba sülen tangokba noksa ka nung Bihar Chief Minister Nitish Kumar aser Deputy Chief Minister Samrat Choudhary den Janata Dal (United) lenirtem angur.

CBI-i Arvind Kejriwal apuba atema Delhi high court-i telangzüba meshir

New Delhi, Chiteni/July 02 (Agencies): Central Bureau of Investigation (CBI) ajanga chief minister Arvind Kejriwal apuba anema pai petition agütsüba nung telangzüba agüjang ta Delh high court-i Mongulbarnü ashi. Court ajanga iba ken o ya July 17 nü jembitsü anogo lemtetogo. CBI-i Aam Aadmi Party tekolakba aputsü nungdak meliasü, ta Arvind Kejriwal indang okatsür senior advocate Abhishek Manu Singhvi-i okadak ashi. "CBI indang FIR ya August 2022 indang lir, aser pa April 2023 nung jaoka ghonda 9 asüngdangya süa liasü. April nungi tang tashi kecha inyaka mali, aser 2022 nung FIR benokba nung ajemdaker pa apu," ta pai court nung ashi. Pa apuba kuli karbo sayutsüla aser iba ama inyakba

indang tamendak dak alitsüla, ta Abhishek Manu Singhvi-i ashi. Apuba tamendak dak ya kiralongrar mesüra 'flight risk' amala nisung asütsüla, ta pai ashi. Pa aputsü nungdak maka, kechiaser pa excise policy ken o nung judicial custody nung lir, ta pai ashi. "Arres memo ya khenyongi balaka. Ajak senteper para ka aser line pezü dang," ta Singhvi-i ashir. Iba sülen Justice Neena Bansal Krishna aliba high court bench ajanga CBI dang telangzüba agütsütsü metetdaksür. "Osang agütsür. CBI tenüng nung osang agizükogo. Anogo 7 tsüngta telangzüba tejangja agütsütsüla. Temotongshitsü kar lira anogo ana tsüngta agütsütsüla," ta court-i shir ken

o jembiba anen. Delhi court kati courtroom nung Kejriwal tendangtsü CBI dang melaba sülen pa June 26 nü iba agency yagi apu. Enforcement Directorate ajanga Delhi excise policy ken o bushisüngdangba dak sendakba nung pa judicial custody nung lir. ED ajanga Kejriwal ya March 21 nü apu. Lok Sabha elections mechi May ita Supreme Court ajanga pa interim bail nung anogo 21 atema chioka liasü. Pa June 2 nü Tihar Jail-i meyipa ao. Taoba ita Delhi court kati excise policy ken o nung bail agütsü, saka Delhi high court ajanga iba totuyuba soita liasü. June 29 nü iba court ajanga AAP tekolakba ya judicial custody nung anogo 14 ayutsü totuyuba agüja liasü.

Jagdeep Dhankhar-i Rajya Sabha nung Mallikarjun Kharge arütsü

New Delhi, Chiteni/July 02 (Agencies): Parliament nung India Tiri jembiba indang Motion of Thanks nung tanen makai o intepba mapang Mongulbarnü Rajya Sabha mendenpuba Jagdeep Dhankhar-i Congress tir Mallikarjun Kharge arüja liasü. Kharge-i tejembidang nung Dhankhar-i Leader of Opposition dang pai menden mezüngmeshiba bilemdangtsü mapang tongogo ta ashi. "Jairam Ramesh-ia künem tashi magütsütettsü, naia magütsütettsü," ta Kharge-i ashiba ajanga Dhankhar-i telangzüba agütsü. Rajya Sabha chairman-i Kharge dang, "Teti tangbo nai menden tashi meiti mekumdaksütettsü. Teti tangbo nai menden mezüngmeshi mesütettsü... Na ajungbena nokdaker ni ashiba mangateti nai jembinüba jembir," ta ashi. "Nai ama iba linük puti otsü aser Parliamentary democracy aser Rajya Sabha senden nung nisung shingaa menden akum metsüboi mali... Shisadangtsü mapang tongogo... Ni teti nü akum wazüka ayutsü meranger..." ta Dhankhar-i

asütsü ya tai asü? Nai yamaji ashir, anemsü nisung ama nai o amshir. Ni komasür yamalaji melatsü? Lokti tentet kati agiogo ta nai ashir. Ibai tai lir. RSS nung züngsem asütsüji tai asü? Yangji kechi kasa lir?" ta pai ashi. Hombarnü Rajya Sabha nung Rashtriya Swayamsevak Sangh (RSS) onük nung Dhankhar aser Kharge tsüngta kanga sashia asatepba sülen Mongulbarnü iba ya atalok. Tiri jembiba Motion of Thanks indang jembishinüba mapang, asen education system ya BJP aser RSS nisungtemi agiogo, ta Leader of Opposition Kharge-i tai tonglokja liasü. "Universities indang Vice-Chancellors, Professors, NCERT aser CBSE ajak RSS nisungtem kübok lir aser shisatsü tajung aliba nisungtem atema yangji kecha mali," ta pai Hombarnü ashi. Item o ya record nungi teti atema indoktsü aser iba amala lokti tentet nung züngsem asütsü ya tai masü, ta Dhankhar-i ashi. "Kharge ji, iba ya record nung malitsü. Ni ya teti atema indoktsü... Lokti tentet mashi

ning züngsem asütsü ya tai asü? Nai yamaji ashir, anemsü nisung ama nai o amshir. Ni komasür yamalaji melatsü? Lokti tentet kati agiogo ta nai ashir. Ibai tai lir. RSS nung züngsem asütsüji tai asü? Yangji kechi kasa lir?" ta pai ashi. Hombarnü Rajya Sabha nung Rashtriya Swayamsevak Sangh (RSS) onük nung Dhankhar aser Kharge tsüngta kanga sashia asatepba sülen Mongulbarnü iba ya atalok. Tiri jembiba Motion of Thanks indang jembishinüba mapang, asen education system ya BJP aser RSS nisungtemi agiogo, ta Leader of Opposition Kharge-i tai tonglokja liasü. "Universities indang Vice-Chancellors, Professors, NCERT aser CBSE ajak RSS nisungtem kübok lir aser shisatsü tajung aliba nisungtem atema yangji kecha mali," ta pai Hombarnü ashi. Item o ya record nungi teti atema indoktsü aser iba amala lokti tentet nung züngsem asütsü ya tai masü, ta Dhankhar-i ashi. "Kharge ji, iba ya record nung malitsü. Ni ya teti atema indoktsü... Lokti tentet mashi

Molungnen O



Asür L. Purchiba Ozukum

Teti dang meima aliba Kinüngbo aser Tsürabur **Asür L. Purchiba Ozukum**, Tsüngremer arishi aser taküm tajung moaja anir arur, pa mapang tatsüka shirang yipten nung aliba mapang nungi tenzüker, tasüba anogo June 25, 2024 tashi, kija, kibong aser lokti balalai nübu, rongsen, shisatsü aser tamang sarasadem ajanga ozü kibong den yaritepa aruba asoshi kanga pelaba metetdaksür. Tsüngremi nenok taküm maneni moajang ta ozü sarasadem. - Temeim Kinungtsü, Chirnur, Anükapang aser Semchirtem.

Küm 30 sülen 1993 Mumbai riots nung aija alir ka puogo

Mumbai, Chiteni/July 02 (Agencies): Küm 31 jenshia senzüba sülen Hombarnü police temi 1993 Mumbai riots dak sendakba nung Sayyad Nadir Shah Abbas Khan puogo. Küm 31 jenshia senzüba sülen arishi küm 65 tain Sayyad Nadir Shah Abbas Khan ya 1993 Mumbai riots dak sendakba nung Hombarnü apu. Pa ya Rafi Ahmed Kidwai Marg police indang team kati Mumbai kübok Sewri area nung apu, ta ketdangtsür kati osangbener dang ashi. December 1992 nung Babri Masjid apenba sülen Mumbai nung azüdokshiba nung Khan shilem agia lir ta tai tonglokja lir. Pa dak yimti nung rongrongshirongba mapang nisung tepsettsü merangba aser temelaba makai nisung ayongdenba tai tonglokja lir. Iba mapang Khan puaka bail meshir okadaki kodanga maru, ta osang ajanga ashir. Iba sülen court ajanga Khan ya 'wanted accused' ta sangdong aser pa anema non-bailable warrant agütsü. Police

temi Sweri nung par ki aiben meita ao saka pa mongutet. Ajisüaka par kinunger indang phone records tem asadanga sülen pa jenoka aliba tesem lazüka liasü. Khan-i Sewri nung par ki semdangtsü akok ta June 29 nü Rafi Ahmed Kidwai Marg police station nung aliba ketdangtsür temi osang angazük. Iba sülen police temi tasa yanglur pa apu. Iba ken o maneni bushisüngdangtar ta ketdangtsüri osangbener dang ashi. Bombay riots ya December 1992 aser January 1993 tsüngta atalok. Iba rongrongshirong nung nisung 900 shi asü, ta historian Barbara Metcalf-i ashir. Asürtem ya timba Muslim nunger aser iba sülen Hindu nunger liasü, ta lai ashir. Iba ken o dak sendakba nung session court kati Mumbai nung taxi driver Rajesh Jaiswal nem tawa temeden agüja liasü. Iba ken o dak sendakba nung tang tashi ano nisung 15 shi jenshia senzür, ta osang ajanga ashir.

UP nung tamangba yimsü sentong ka nung nisung 107 ajemset

Agra, Chiteni/July 02 (Agencies): Mongulbar nikonngdang Uttar Pradesh kübok Hathras district nung tamangba yimsü sentong ka alidang tetsürtem timba sür nisung 107 ajemset, ta police tanishir kati ashi. Additional director general (Agra zone), Anupam Kulshrestha indang office ajanga asür nisung 107 rongnung tetsürtem timba lir ta ashi. Kechi ajanga iba lendong ya ataloktsüsa akumar ano mejangja, ta ketdangtsürtemi ashir. Tamangba yimsü indang sayutsüngir Bhole Baba-i o jembiba atemba sülen iba tesem nungi tetsür ka arrsanga adokli iba lendong ya atalok ta osang kar ajanga ashir. Tzüngsang kanga atsükba ajanga iba tesem nung nüburtem tango mesashitet akum südi

asür 'satsang' temli telung nung alirtem nungtepa adokdang tetsür aser tanur timba sür parnok ya ajemset südi ta angateter, ta Inspector general Aligarh Range Shalabh Mathur-i ashi. Iba lendong atalokba tesem anasa Etah nung aliba district hospital nung temang anepalua alir teinlonglong Jyoti-i ashiba agi, nisung ajak aritepa iba tesem nungi adoktsü atema danga lenmang kecha meliasü, asür nisung ka ma nung ka laoa ajemshi tenzüker," ta lai ashi. Jyoti-i iba tesem nungi adoktsü merang, saka kimalen motorcycles anena aliba ajanga lenmang nokdang liasü. "Nisung aika süchia ao... dangartem asü," ta lai ashi. Bhole Baba-i iba sentong agütsü atema temelaba asüngdang aser mela, ta police tanishir Mathur-i ashi.

Nisung tasüang tem autopsy atema Etah district hospital bushia bener aor aser nungdakba mera tem agiogo, ta Anupam Kulshrestha-i ashi. Chief Minister Yogi Adityanath-i asür kinunger nem teyari sen lakh ana-na agütsütsü aser yirur alir shia nem sen 50,000 agütsütsü sangdongogo. Iba sentong ayonger anema FIR ka benoktsü aser aibelener nem tapet temerenshi agütsütsü, ta pai ashi. "UP sorkar nung minister Laxmi Narayan Chaudhary, Sandeep Singh nunger iba lendong atalokba tesemi ogo aser state indang Chief Secretary Manoj Kumar Singh aser Director General of Police Prashant Kumar dang lendong atalokba tesem atongtsü totuyuba agütsüogo," ta UP chief minister-i social media X nung ashi.



TIR YIMYIM YIMOBILEM (EDITORIAL)

DIMAPUR RASEMNÜ, JULY (CHITENI) 03, 2024

Ojunga jembirtem

L inük nung taküm 2024 nungi tenzükba tatar senden tuluba, 18 buba Lok sabha mezüng senden nung külen ato kilonser Narendra Modi aser külen opposition lenir Rahul Gandhi nati anir tatartemi pei pei mapang nung jembiba angudang aser angashidang janratema angar aser taküm nung tagitarutsü aika angazüker. Iba senden yabo yimten yimsüsür tatar senden ka dang masü saka tesayur tajungtem adenshia nübortem den linük nungdakba aser tebilemtsütem lemsatepba senden amai ka dang repranger, anungji angar manennütsüka angar. Alima nung nisungtem lia aotsüba sentong aser mapatem ajak ya o agi tenzük. Aji oda, nübortem asoshi telemtetba agidak sabangji o lemtepdak lir, anungji shisa tasen aser tajung bener arua tangatetba tajung agi shibai tangar mulung koka o jembiteter, pa mesüra lajiang shitakba lenir akümer. Atangji, temaba menden nungbo teimbai mulunga shimtetsangang amentsü, saka teimbai mulunga shimtetsüsang jagi senden nung o junga mejembitetra, telokjibo o jembiri jembiba nung telemtetba agiyonga aotsü. Tatar senden nung balaka pei nübortem tenüng nung pei nübortem asoshi tangar mulung koka jembitetba tatartemang nungdaker, kechiyong tatar senden nung adentsü yokba tatarsangji tangari jembiba angatsü asoshi dang masü saka pei linük aser nübortem nungdakba ken o jembitsü yokba lir. Aji oda, tashitemetet aser o jembitetba nisung masü saka asenoki taka-tait aser nütsüng inba apir tatar yimsüsür shimer tatar senden yokra, ibajibo kententsü sempet maliba nisung ka choir nung adentsü shimer yok amai asütsü. Tanü 18 buba Lok sabha senden mezüng senden nung linük tiri jembiba o jepzüka jembirtem rongnung government nung alir tatartem dang nungibo opposition nung alir tatartemang tashiba, temetetba aser tajungba jembiba angur. Iba jagi government yimsüsübaren tajungba akümtsü imlar. Aji oda, tatar tejenpurtem rongnung tatar senden nung opposition teloktem nungi o junga jembiteter Rahul Gandhi, Shashi Tharoor, Chidambaram, Mahua Moitra aser Gaurav Gogoi nungertem ama den ano tang tasen aiterem rongnung Manipur nungi Bimol Akoijam aser West Bengal nungi Rajya Sabha nung Sagarika Ghose nungertem adenba agi India ya tenüng agibo BJP teloki aniba NDA government-i anitsü saka shitakba NDA government nem mapa agütsürtemjibo opposition telok nungi o junga jembitetertemji asütsü. Tanü India tia ajung, item o junga jembiteter tatartemji opposition nung lir. Item amaji ka mali nungbo government nung alirtemi shinga nüken metsübui pei sünütsü asütsü. Tatar senden nung o junga jembitetbaji tsüngru asongba kisüng agi masü saka pei lima aser nübortem tia junga metetba agi aser pei dak pei lima asoshi aria bilemba shisatsü aliba agi jembir. Aji oda, tatar senden nung jembiba yabo jepdak o jembir masü saka zünga shia aliba agi aser nübortem tia ajangshia metetba agi jembiteter. Atangji, tatar shiaji pei lima aser pei nübortem asoshi o jembirtem lir aser item o temji tarutsü nunga lanu asensortem asoshi leniba milen amai akümer. Aji oda, akhidang tatar senden nung Jawaharlal Nehru aser Atal Bihari Vajpayee nungertemi jembiba o tanüa tatar senden nung tatartemi lephsia jembir. Atangji, ajak kasa masü saka tatar senden nung shilem agitsü atema shimba yimsüsürtembo pei lima aser nübortem asoshi nungdak ken o benoka jembitetba nisung asütsü tim. Item jagiang tatar sendena lemladaksür aser yimtena akangshidaktsür. Tanü Lok sabha aser Rajya sabha nung opposition nung alir tatartemi government nung alirtema angüma matutetsüsa ken o shitak benoka janratema jembiba angudang, asenok assembly nunga opposition lilasang parnok amaji yimten ken o junga jembir karbo lila aser government-a tajungba süla ta sasaseta bilemer.

OLEMSABANG

TAWA AGIBA LOK SABHA ELECTION AJANGA NÜBUR TAGINÜBA MAPA AGI SAYUOGO

~ L. Kika Pongener.

(Yashi adok nungi...)

Aji oda, tang Lok Sabha Election mapang India lima ajunga nung Khristan-temi küküa lumia sarasademba aser sarasadem yinzü (Chain of Prayer) ayongzüka sarasademba Tsüngremi langzüa, BJP temeja agi yimsu asütsüsa takok mongudaktsüba ya asenok Khristan-temi takok tuluka nguogo...ta bilemer. Aji oda, tang sorkar kümer oaka BJP temeja agi akümba sorkar masüji, kopika moi sorkar raksatsüa kecha meteta maka. Ashiko, ita ishika sülen Congress-i aniba INDIA teloktep-iang sorkar akümtsüa kecha meteta maka. Tejen putu nunga Babylon yimli nung Nebukadnezzar chubai yangluba sungyanglu külemtsü memelongertem kar Molosongzü kangla nung inoktsü aser kar misem jangrua alidak enoktsü...Aser Nebukadnezzar chubai chuba mendenji pa sasa angu amai mezümeküma asükema bilem...Saka Tsüngremi pa arem moapu nung Nashi amai rem mejakdaktsüba otsü laishiba nung azünger. Tsüngremi inyakdi ta sura Tsüngrem tsüngdang tamakoktsü kecha mali. Alima chuba menden aser chuba yimli ajungaji Tsüngrem kapu nung yua lir. Anganu-aka manganu-aka, asen Naga lima nung, MLA-60 prongla Khristan temeja agi yimsu asüba linuk ka nung, kangasa tesasatsüka, asen yimsusurtemi India lima nung tamang yimsu anema jakdak-jakdaka tashiyim/tamajung inyakba anogo shia angashia, ngua, metetaka, yabo timmasüa ta ola kata madoki, mangashi, memetet aser mangu amai toktsüba angudang nüburtem kangasa sungmanger...!!! Aji oda, Center sorkar nungi senotsü Fund tangutsü tim shitak mangutsü tsübuba agi ola madoker asü (?) Mesura Prime Minister, Home Minister aser Naga nunger yimsusurtemi Tsüngrem amai akümtsübuba...Assam Chief Miniter, Himanta Biswa Sarma parnok mepelatsü tsübur asü (?) Mesura kechi tsübuba agi ola madoker...???...ta nüburtem kangasa sungmangseter...!!!

Tatishitsü ka...Asen Naga nunger dang ya 'SEN' agütsüdi...Christian yimsu ya toktsür Hindu yimsu dangi meyipang ta ka ashinungpo...Mesura Minister menden, Portfolio & Position tajung agütsütsü'ar...Christian yimsu ya toktsür Hindu yimsu agizükang ta ka ashinungpo...Ashiko, asen Naga nungerbo, Politician-temi anir nübur teimba kati akoseta pelaseter Hindu yimsuji agizüktsü sudi...ta bilemer. Tangar kintem oda yutsür, asen Aotsür Aor tangar dang nungi tamasa sen aser jenjang tajungji arishia/penbua mela-mela aikati Hindu yimsuji agizüktsü sudi ta bilemer. Atangji, asen Naga nungeri Election nung sen noklang/merijang ishika yong pei temeden Vote ayoker nung kodaser sen nung malangtsü...!!!??? Ano tawa Lok Sabha Election nubuyimba mapang 'Public Rally' alidang, asen yimsusur karibo Congress yimsusuba mapang America nunger Missionary-tem aritoka ta...Ano Congress-i yimsusuba mapang Christian-tem anema tamajung aika inyakba ken o tapu-tapu jembiba angazükogo. Ajisuaka, tang NDPP & BJP nung dena alirtemji...Chief Minister-bai anir parnok teimba ka Congress Party nung tongti lennir sua aliba...Congress Party toktsür NDPP & BJP nung adenertem lir...Anungji tanü vote aginudang, tajung suaka, tamajung suaka, parnoka dena aliba Party-i inyakba mapa anema jembibaji, parnoki pei sasa pei temeyong metepshirba dang asütsü...Saka parnoki jembibaji shitak asü tai aji nüburtemi tejangja meteta lir. Anungji asen Naga nunger yimsusur (Politician)-temi kanga junga angatetsübaji...Tawa agiba Lok Sabha Election nung, nüburi sorkar dak tamang mekatetba aser sorkar den amalitep maliba küli tejangja mapa agi sayuogo. Anungji Opposition maliba sorkar-a ta temulong lemseta malitsüla, aser yashi-yakenu agiba Urban Local Body (ULB) Election nung NDPP & BJP teimba adokogo ta temulong lema meli-i...Lok Sabha Election nung nüburi sorkar dak tamang mekatetba mapa agi sayuba nungji lesson tuluka agitsüla. Anungji yimsusurtemi nübur taginüba metetsü kanga merangtsüla aser nübur temulong achitsüsa yimsu asütsüla.

METONGSHIR

Tir Yimyim June 29, 2024 adok nung "LUSHITSÜ MAKOKBA TESASATSÜ" olemsabang nung "kinungtsü tenaprongla..." ta aliba olung ana agiener aser "Tekahaimongi" ta alibaji "Dekahaimong" ta metongshitsür.

~ M. Meren Ex. Pastor Ungma

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Pakistan nung Khristan ka nem tasüba temerenshi agütsür



Islamabad, July 2, 2024 (Agencies): Pakistan nung okadak kati Khristan ka nem tasüba temerenshi agütsüogo.

Yaküm August ita social media nung iba nisung yagi post ka asüba sülen Faisalabad district nung tenla ki aser Khristanem ki aika rongdoktsü.

Khristan anati Holy Quran mezüngmeshi ta tai tongloktsüba sülen Jaranwala tehsil nung tenla ki 24 aser Khristanem ki 80 tema rongdoktsü. Iba tatalokba sülen Muslim nunger 200 tema apu saka tang tashi parnok nisung ka danga aija mali. Nisung 200 tema apuba nungi parnok 188 chiokogo.

Muslim nunger mezüngmeshi ta tai tongloktsüsang Ahsan Raja Masih nem tasüba temerenshi agütsü.

Honibarnü Anti-Terrorism

Court Special Judge (Sahiwal) Ziaullah Khan-i iba obendang agüja liasü.

Okadakisa Masih nem küm 22 tepuokdak ayutsü aser Rs 1 million senchi achitsü temerenshi agütsü. Pakistan Penal Code (PPC), the Anti-Terrorism Act (ATA) aser Prevention of Electronic Crimes Act (PECA) kübok section balala nung pa aitsü.

Masih-i TikTok nung ashishitep aketba osang metetdaksü aser iba ajanga Muslim nunger temulung yirutsü.

Pakistan sorkari tenla kitem aser Khristan tamanger ki rongdoktsür shinga metoktsütsü ta nangzüka liasü saka iba amaji meinyak.

Islamabad police-ia 'Minority Protection Unit' ta ser police 70 telok kati tanga yimsü

amangertem kümzüksü atema tenteta liasü.

Pakistan nung Christian aser Hindu nunger kümzüka mayuba atema alima teti aija arur.

Pakistan blasphemy laws kübok Islam mesüra Islamic religious figures mezüngmeshitem tasüba temerenshi agütsütsü lateta lir.

"Tenla ki aser Khristan tamanger ki nung mi senoktsür nisung ka danga aija mali. Tang tashi nung Muslim nunger 12 anema dang ken o benoka angadangdar aser tanünga ajak chiokogo" ta All Minorities Alli-a-nce chairman Akmal Bhatti-i ashi.

Kümtem süia arudang taila blasphemy ken o aika adokogo aser iba ajanga Christians aser Ahmadi Muslims timtemer ta Human Rights Commission of Pakistan (HRCP)-i ashi.

Chandel nung Khristan kaketa ana saya



Chandel, July 1, 2024 (Agencies): Manipur nung Rev. Dr. Koningthung Ngoru Moyon-i züluba kaketa ana sayaogo.

Pai züluba kaketa anaji "Commentary on Ecclesiastes: The Proclaimer" aser "Basic Preaching" lir aser Penaching village Chief/Chairman Khp. Komenshing Chara aser Penaching village Pastor Rev. Burin Khartu nati kaketa ana sayatsü.

Deobarnü Penaching Baptist Church, Chandel nung anepdang tekülem sentep nung kaketa ana saya.

"Kaketa ana ya Christian academic works lir aser iba ajanga taküm melenshitsu

akok. Tali angazüksü aser angatetsü atema kaketa ana azüngtsü mepishir" ta Rev. Dr. Koningthung-i tesentepertem ayongzüik.

Rev. Dr. Koningthung ya Moyon Naga Baptist Association (MYNBA) nung taoba Executive Secretary lir.

"Rev. Dr. Koningthung-i kaketa tajung zülur aser research tajung agir. Moyon nunger aser Khristanem asoshi iba ama tongtipang aser nüngdakba kaketa züluba atema pelar" ta Rev. Burin Khartu-i ashi.

Rev. Dr. Koningthung (D. Min/D.D./Th.D/Ph.D) ya Baptist ordained minister ka lir aser pa ya Penaching village,

Chandel district nungi Moyon Naga nunger ka lir.

Rev. Dr. Koningthung-i teaching, administration, pastoral aser evangelistic mapa tapu balala inyaka arur. Pa ya tang International Institute of Biblical Studies (IIBS) nung Chairman lir aser M2M Cross Culture Mission & Seminary (M2MCCM Seminary) nunga faculty member ka lir.

Pai India Prime 100 Professors Awards 2022 aser Top 10 Visionary Future Leaders 2023 narokümtem agizükogo.

Pa nemsä Hypedge International Brilliance Award 2021 aser Best Author of the Year agütsüogo.

ANOGO ABEN TSÜNGREM DEN

Bendanga Azüokba

"Pa tasa asaba asenoki memeteti mali"

(2 Kor. 2: 11)

Satani maneni mapa inyakbaji tashioktsüba mapaji lir, aser Khristan aikati pai inyakbaji tai inyaker ta memeteti inyaker. Saka Khristan aikati tai inyakogo ta nangzüksü arendaker, saka Khristan nüjibaji samar aser tamajungba küboki air ta mebilemer. Aji saka, Satani atidangba nung tsüker talenba küboki aiba Laishiba nung peria shia lir.

Demoni azüokba tetezü Satan meyong akümba masü. Na san chanu zü agi alizük, aser molumi tashi-ia ne tekümtet na nungi rakzüksü makok (1 Peter 1: 17 - 19; Rom 8:3539). Satani na-ji pa meyong tanaben akümstsü makoktsü ta metet, saka pai lenmang ka nungi na külakoktsütetra aser ne taküm tesem kar nung azüoktetra, na ainba aser alima nung na tenzükbä mapa ajema kümdaktsütetsü ta metet.

Asenok alima koba satan meyong lir, idakji alir asü nung, tatidang, ashioktsüba aser tai agütsütepba maneni alir. Nai pa tasa ne taküm nung melara, ashioktsüba azüoktsü tashi samatsü akok. Tiyazü nung amangtsüsa pai na mesüzüktetra, pai ne taküm azüoktsü akok.

Tsungrem mesüka yangluba raksatsütsü asoshi pai asenok taküm amshitsu meranger. Temeim shisatsü, ajemalu aser temulungjang temerükji Khrista mesükba jaklatem lir. Satan nükjidongji ibaji raksatsütsüba lir.

Satan nokdangtsü nok-o-nü agütsüba asoshi Ne tenüng asanger, Kibuba. Tanü pa tasa anema ni kümdangdakjang.

UP okadaki Khristan tamanger-tem sentong melidaktsütsü tuyur

Allahabad, July 2, 2024 (Agencies): Uttar Pradesh

tamangba sentongtem magütsüla kechiyong iba ajanga Hindu nungeri Khristan yimsü dangi meyiptsü akok ta metetdaksüogo.

July 1 nü Allahabad High Court nung single bench kati Uttar Pradesh sorkar dang tangsa tamangba yimsü sentongtem anendaktsütsü tetuyuba agütsü.

"Iba mapa ya inyakdaksüra linük nung tanü majority population ya künü anogo minority akümstsü" ta Justice Rohit Ranjan Agarwal-i ashi.

Kailash ta ser nisung ka religious conversion ozüng kübok tai tonglokja lir aser pai bail meshiba ken o angadangdang Justice Rohit-i iba ya ashi.

Kailash-i par medemer ka Hamirpur nungi Delhi-i anir ao aser iba sentong nung nisung aika Khristan yimsü agizük. Iba atema pa dak tai tonglokja lir.

"Scheduled Castes aser Scheduled Tribes pur nisung aika tamangba yimsü melenba osang iba okadaki arua lir. Sensakertem dena SC asr ST pur aika Khristan yimsü agizüker" ta Agarwal-i ashi.

Indian constitution nung Arlla 25 ajanga "freedom of

conscience and free profession, practice, and propagation of religion" agütsür saka iba ajanga tamangba yimsü ka nungi tanga kati melentsü temeten magütsür ta paisa ashi.

"Iba Arlla nung 'propagation' olung tetezü ajungkettsü saka iba ya nisung ka tamangba yimsü ka nungi kati melentsüba ashir masü" ta Agarwal-isa ashi.

Uttar Pradesh Prohibition of Unlawful Conversion of Religion Act, 2021 tamangba yimsü melenba noktanger.

2017 nungi Uttar Pradesh nung Bharatiya Janata Party (BJP) ajanga sorkar yimsü süa arur aser parnok ozüng tim mesüi amshir ta Khristan lennirtemi ashir.

"Obendanger jagi tamasa nisung kar tamangba yimsü melen asü memelen meteter ang lemtet ka agütsüla" ta New Delhi nung Catholic lennir AC Michael-i ashi.

"Linük nung tashiyim agi yimsü melendaktsür ta ser pastor tem aser nübertem anema ken o tem benokaka okadak kati danga Khristan ka khen danga aija mali" ta Michael-isa ashi.

"Iba obendanger yagi lemtet meyipa agütsüla" ta paisa shisem.

AO OSHI ANGAZÜKDAK:
TANÜ ANGAZÜKTSÜBA OJANG



Tain

(adj) mapang agi taküm ka tulu aser talang küma aoba (matured, fully grown)

*Yosef Egypt lima nung tain küma ali.

Tair

(v) telonglen mesüra tsünglangleni alur (about to go down)

OLONG PAITEP # 6835

1					2				3
							4		
5		6			7				
8									9
							10		
				11	12				
		13							
14					15				
				16					

TIPIEN

- 1. Ojembitsü tashi - 8
- 5. Süngjang tapu ka - 5
- 7. Tekanük nung enokba - 5
- 8. Teka amtep - 5
- 12. Tzüc asendak - 5
- 14. Tsünpang tema aliba - 5
- 15. Ken atenba yimya - 5
- 16. Asangur - 8

LANGTSÜNGLEN

- 1. Tepok telung nung shilem ka - 7
- 2. Tamajung aküm - 5
- 3. Chi den külemi achiba - 3
- 4. Meimchir alimai aruba - 3
- 6. Laishiba nung ayong ka - 4
- 9. Tarutsü nukla - 7
- 10. Tamendakdak/Nükjildong - 4
- 11. Tenük-telen mejungi aküm - 5
- 13. Terok nungi adokba - 3
- 14. Meimchir telemsa - 3

OLONG PAITEP # 6834 TELANGZÜBA

TIPIEN :

- 1. Taa, 3. Teküm, 6. Aibelen, 7. Aut,
- 9. Ajizük, 10. Ojala, 11. Semer,
- 13. Sen, 15. Kioktsü, 17. Itsük,
- 18. Kar.

LANGTSÜNGLEN :

- 1. Tai, 2. Asensor, 3. Tanü, 4. Kua,
- 5. Mitsüktsü, 6. Azübenshi, 8. Lah,
- 9. Jangkok, 12. Akok, 14. Nashi,
- 16. Sür.

NAI-A YA METETTER MA



Dutch nunger nisung 8-i alima nung bicycle talangtiba yanglutetogo. Dutch nunger engineer temi yanglutetba bicycle ji 180 feet, 11 inches talang lir. Iba mapa ya arishi küm 39 tain Ivan Schalk lenisüba kübok telok kati yanglu Guinness World Records ajanga metetdaksü.

Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimim@gmail.com nung yokang mesüra Tir Yimyim bureau tem nung agüjang.

Mizoram nung tanur ka dena kibong ajunga anenset



Aizawl kübok Zemabawk kiyong nung anentsüh lendong ka nung arishi küm 4 tain tanur ka dena lar tsüraburtem anenset. Asür kibong noksa yangi angur.

Aizawl, July 2, 2024
(Agencies): Aizawl kübok Zemabawk kiyong nung anentsüh lendong ka nung arishi küm 4 tain tanur ka dena lar tsüraburtem anenset.

Tasür kibong ya Isak Chhangte (32), pa kinungsü wife Lalrinthari (25) aser arishi küm 4 tain jala Abigail Lalchhanhimi nunger ta jangjaogo.

Par asem indang tasü mang süngdang Zemabawk nung aliba Seventh Day Adventist Church-i bener ogo aser July 3, 2024 nü asüpila sentep sentong agitsü.

Mizoram nung tzünglu kanga aruba ajanga tesüiba ghonda 48 tsüngda anentsüh lendong aika atalokogo. Mongulbarnep Aizawl kübok Zuangtui kiyong nung ki asem anentsüh agi anenzüka bener ao.

Aizawl nung Salem Veng Local Council ajanga kibong 20 tashi aniena liasü.

Tzünglu kanga aruba ajanga Mizoram nung tanü school ajak shibang.

Aizawl kübok Chanmari aser Ramhlun tsüngda tongtipang lenmang ka anembangba ajanga

senzüsönbongertem timtemer.

July 1 nü Aizawl nung Government Zirtiri Residential Science College ajanga July 5 tashi college shibangtsü osang metetdakja liasü.

Lenmang nung lendong atalokba den anentsüh atema class magitsü aser July 8 nungiang regular classes agitsü ta college-i metetdaksü.

Tsüngsang majungba ajanga Mizoram sorkari public notice ka agütsüogo. Tzünglu kanga arutsü aser district aika nung lendong ataloktsü akok ta sorkari ashi.

Assam tzümet süng nung nisung 3,057 aser shiruru 419 kümzükogo

Guwahati, July 2, 2024
(Agencies): Assam tzümet süng nungi nisung 3,057 aser shiruru 419 kümzükogo ta Assam Police-i metetdaksü.

State Disaster Response Fund (SDRF) aser Fire and Emergency Services Assam ajanga nisung ajak kümzüktsü merangdar ta police-i ashi.

Assam nung tzümet süng tensa tamajungba kümogo aser iba ajanga district 14 nung kongshia lir. Tang tashi nung 2,70,628 tashi timtemer aser tzünglu average

rainfall 21.6 mm tashi aruba ajanga tensa tamajungba aküm.

Bankuwal aser Golaghat nung tzünoktang ka anogo asem tsüngda tenzüktsü. Iba mapa nung advanced technologies amshitsü aser anogo 15 tsüngda yangluzüktsü ta Assam Minister Pijush Hazarika-i ashi.

"Dibrugarh nung tzümet süng tensa reprangdar. June 28 nungi Brahmaputra River nung asetkong tila ka nung angopurtem maruteti lir" ta Assam Chief Minister Himanta Biswa Sarma-

ia ashi.

River Dhanashree aser River Brahmaputra nung tzü kanga ayimba ajanga Orang National Park metsüngbanga lir.

Brahmaputra aser Dhanashree den River Pasnai nungi tzü ajanga park metsüngbang aser shiruru den park personnel pur timtemer.

Orang National Park telung nung camp 50 aliba nungi 20 atsübangogo. Khayarasali aser Balicamp tesemtem nungbo tzü feet 7 nungi 15 shi atsünga lir.

GOVERNMENT OF NAGALAND
DIRECTORATE OF INDUSTRIES & COMMERCE
NAGALAND : KOHIMA

ADVERTISEMENT

Sponsored Skill Development Training for Entrepreneurship & Livelihood Opportunities

Applications are here by invited from interested Scheduled Caste and Scheduled Tribe (SC/ST) candidates to avail/undergo Skill Development Training, under National SC-ST Hub Scheme implemented by National Small Industries Corporation (NSIC), Ministry of MSME, Govt. of India on the following Course.

SN	Job Roles/ Course Name	Eligibility	Duration	Training Centre Venue	Commencement of Training
1	Manual Metal Arc Welder/ Shielded Metal Arc Welder	CI-8 Passed	2½ Months	Nagaland Tool Room & Training Centre (NTTC) Dimapur	2 nd Week of July 2024 Onwards

Benefits of the programmes:

- Job placement assistance.
- Assistance and Guidance for setting up of new enterprise.
- Guidance on availing benefits from Government Schemes & Programmes.

Age Limit: 18-42 Years

Documents Required.

- 1. Educational Certificates
- 2. Birth Certificate
- 3. SC/ST Certificate
- 4. Aadhaar Card
- 5. Passport Photo (3 copies)

Note:

- 1. Selection & Admission "First come First serve".

For detail information contact;
Nagaland Tool Room & Training Centre (NTTC), Dimapur
New Industrial Estate, Sub-Jail Junction (Tinali), NH-36, Dimapur: Nagaland, Pin – 797113.

For Enquiry
CONTACT: 8837426161/8732001491/7005876150(M)

Website: www.nttcdimapur.org.in
Email: nttcdimapur@gmail.com

Sd/- P. Tokugha Achumi, Director Industries & Commerce Deptt.

Nepal Congress aser CPN-UML lokteper sorkar akümtsü



KP Sharma Oli



Sher Bahadur Deuba

Kathmandu, July 2, 2024 (Agencies): Nepali Congress aser Communist Party of Nepal (Unified Marxist-Leninist) (CPN-UML) tsüngda tenangzükteper tasen ka agiogo aser parnok lokteper sorkar tasen ka akümtsü.

Iba ajanga March 4 nü Nepal nung sorkar tasen küma aliba loksatsü.

"Telok ana tsüngda küm ka ser tesadang kümsük lemsateptsü atema tenangzükteper agiogo" ta Congress President Sher Bahadur Deuba aser UML Chairman KP Sharma Oli nati

ashi. KP Sharma Oli-i mezüng küm ka ser tesadang sorkar ketdangsütsü aser iba sülen tanüngba küm ka ser tesadang Sher Bahadur Deuba ket nung agütsütsü.

"Yasüng Nepali Congress lennir Sher Bahadur Deuba aser UML Chairman KP Sharma Oli na tsüngda sorkar tasen ka akümtsü tenangzükteper agiogo" ta Nepali Congress lennir kati ashi.

"Party anati Pushpa Kamal Dahal (Prachanda)-i aniba sorkar medendaktsütsü lemtet aser ministry tem lemsatsü

lemtetogo" ta UML lennir kati ashi.

"Sorkar ketdangsüba teloki Home Ministry abentsü. CPN-UML-isa Koshi, Lumbini aser Karnali provinces nung sorkar akümtsü aser Congress Bagmati, Gandaki aser Far-Western provinces nung sorkar akümtsü. Madhesh party temi Madhesh Province nung sorkar akümtsü atema lennir anati mulungtepogo" ta UML lennirisa ashi.

Telokteper tasenisa taoba Chief Justice Kalyan Shrestha lenisüba kübok election procedures aser constitution reprangshimtsü atema luden ka shimogo.

Yasüng senden nungsa Vice President nem National Assembly chairman inyakdaktsütsü atema constitutional amendment agreement ka yangluogo.

Iba tenangzükteper nung sign mesütepang Congress aser UML lennirtemi President Ram Chandra Paudel den ajuruteper aser telokteper tasen yangluba osang lemsatepa liasü.

Prince Harry nem ESPY Award magütsütsü atema online petition agir

New York, July 2, 2024 (Agencies): Prince Harry nem American war hero sempet agütsüba anema nisung 30,000 temai petition ka nung sign süogo.

2024 ESPY Awards nung Duke of Sussex Prince Harry nem sempet agütsütsü ta osang metetdakja liasü. Iba sentong nung ESPN-i athletes aser sports figures nem tenüngsang agütsür.

Harry-i Invictus Games nung inyakba atema Pat Tillman

Award agütsütsü ta ESPN-i ashi.

ESPY Award ya footballer Pat Tillman nungtem nung jaloktsüba lir. 9/11 sülen pai sports toktsür sepai tenzüksü mulungtet aser pa Afghanistan nung khaset.

Ajisüaka, Change.org petition ka ajanga ESPN dang Prince Harry nem Pat Tillman Award magütsütsü atema mepishir.

Külen, Heritage Foundation director Nile Gardiner-i ashiba

agi "Harry indang award atema ashishitep ken o tulu adokba ajanga Prince Harry aser Meghan Markle na mesapuba sayur."

"Harry aser Meghan na inyakyim United States nung junga merepranger aser America nung teimbai Royal Family meimer. Harry aser Meghan nati United States nung royal family mezüngmeshiba atema nübortem mepelar" ta Gardiner-i ashi.

Israel-i amakba ajanga Palestine nunger aika Gaza toktsür jena ao



New York, July 2, 2024 (Agencies): Israeli sepaitemi Mongulbarnü Gaza Strip anüdoklentip tsütsü tesem aika nung bomb amshia amak aser iba ajanga Palestine nunger meyrirjang aika pei talidak toktsür jena ogo.

Yashi khatepdang Palestine nung 8 asü aser aika yiru ta health ketdangsürtemi ashi. Külen, Israel sepaitemia yashi khatepdang sepai ana asüba osang metetdaktsü.

Hamas anema kanga rara joko anener aser tang nungi targeted operations inyaktsü ta

Israel lenirtemi ashi.

Mongulbarnü Israeli tank-i Zeitoun neighbourhood nung yimdong ka amakdang Palestinine nunger 17 tepset.

Israeli army-i Hombarnü Khan Younis nung jila aser yimtsüng aika nung alirtem pei talidak toktsür aotsü tetuyuba agüja liasü.

Ajisüaka nisung meyrirjang aika pei talidak toktsür moi liasü saka yasüng Israeli tanks aser planes amshia Karara, Abassan aser tanga tesemtem amakba agi nisungtem jena ogo ta Hamas media ajanga metetdaktsü.

Hombarnü Khan Younis nungi Israel tsütsü rockets 20 shi ka khaloktsüba tesemtem Israeli sepaitemi amak. Parnoki weapon storage facilities aser operational centres amak.

Item tesem nungi civilians odaktsütsü atema onok bomb amshia mamakdang maparen kar inyakogo. Hamas-i civilian infrastructure amshir aser nübortem jung ama amshir, ta Israel sepai ketdangsüri ashi.

Yakünü Israel tsütsü rockets khaloktsüba atema Hamas den yariteper Islamic Jihad-i tenüng agiogo.

KANGA PELABA LEMSATEPER



Kü tenüng **R. Chubazüngla**, NDPP Candidate Urban Local Bodies (ULB) Ward No 13 nungi lir. Tamasa asen teyanglur Tsüngrem nem tenüngsang agütsür. Kü taküm nung nübor tenzüksü jangra aliba ama, nenoki ni ULB election nung takok tulu ngua adokdaktsüogo, iba wako amer kü tashi aser shisatsü agi akok tashi ni nübor asoshi nokdaktsü.

ULB election-i aitsü melongteter inyaktepa arudang, nübor ajaki tetenzük nungi tatem tashi pei pei akok nübo, rongsen, shisatsü, aser sarasadem takang agi nungita aruba asoshi ni aser ozü kibongi nenok ajak dang kanga pelar.

Ajak den alia tenüngteta item kija aser telok dang kanga pelar:

1. Shri Moatoshi Longkümer, MLA & Advisor for Labour & Employment, Skill Development & Entrepreneurship & Excise Department, Govt. of Nagaland.
2. NDPP party nung doklanga tenzükerter lanu tain ajak.
3. Dimapur Ward 13 nung alir, Landmark Colony, Midland Colony, Kyong Colony & Residency Colony nungi nungi teyariteper ajak.
4. Changtongya Senso Telongjem Dimapur.
5. Changtongyatsür Telongjem Dimapur.
6. Shimpojangtsür Telongjem Dimapur.
7. Jalonger Welfare Society Dimapur.
8. Chuchuyimlang Village Council.
9. Rionsanger Tambu Süngpo Zünga Dimapur Unit.
10. Dimapur Area Chuchuyimlang Longkümtsür Telongjem.
11. New Church Construction Committee R.B.C
12. Rongpangmen Baptist Arogo.
13. Ao Lanur Telongjem Duncan Unit.
14. Meranglar Self Help Group.
15. Tamsa ozü kibong den kija kibong aser lokti tentet balalatem-i shisatsü, nübo, rongsen agi nungita tatem tashi yariogo. Ozü kibong-i nenok ajak dang kanga pelar. Tulusang Tsüngremi nenok ajak moajangma.

Tanü nungi tenzüker ano tali tashi taitba nung asenok ajak teka ka, temelong ka aser mangdang ka ser alima terenlok asoshi nokdakdi nii ta ayongsemer. Kanga pelar.

**Nenok den ;
Councillor R. Chubazüngla
Dimapur, Ward No. 13.**

PELABA LEMSATEPER

ULB election 2024 nung kü dak tamang kateta nenok senti vote agütsüba atema ward sanger ajak dang kanga pelar. Talisa kiyonger, tembar tinu, yimeryimsanger, temeimertem aser kinunger kwinakati, nübu, rongsen, shisatsü aser sarasadem agi ni nongita yariogo, nenok ajak dang mejeta pelaba lemsateper. Iba takok ya kü kija takok masü saka arok meyong, aser maneni ward sanger ajak longjemer yaritepa aoba ajanga terenlok akaba ward ka asütsü kü sarasadem.

**IMLIKUMZUK KICHU
NDPP candidate
Alongmen Ward No. 2**

Imran Khan kinungtsü nem bail melar

Karachi, July 2, 2024 (Agencies): Pakistan kübok Rawalpindi yimti nung special court kati taoba Prime Minister Imran Khan kinungtsü nem interim bail temelaba agütsüogo.

Imran Khan ya yaküm August ita nungi tepuokdak yua lir aser taküm February general election matongdang ken o kar nung pa aija iasü.

Ajisüaka, Hombarnü UN human rights working group-i Imran tepuokdak ayuba ya international law alema lir ta metetdaktsüogo.

"Special accountability court ajanga bail melaogo" ta ARY News-i tanü metetdaktsü.

Imran aser pa kinungtsü Bushra Bibi naprongi tena anema ken o benoka aliba nung tim masüba kecha inyaka mali ta ashir.

Al Qadir University yangludang tenati land developer ka ket nungi senotsü angu ta tai tonglokja lir.

Ajisüaka Bushra Bibi ya maneni tepuokdak ayutsü kechiyong lai Imran den kibong akümba ya ozüngi memelar ta aija lir.

Tesüba ita ishika tsüngda Pakistan nung okadak balalai Imran Khan tepuokdak ayutsü temerenshi thinentsüogo.

Pakistan nungi taoba cricket superstar Imran Khan anema ken o aika benoka lir.

Euro 2024: Netherlands quarterfinal-i iogo



EURO 2024 | Round of 16
ROMANIA 0 VS 3 NETHERLANDS

Chiteni/July 2, 2024 (Agencies): Tang asaya aliba Euro asayamung nung Mongolbarnü Fußball Arena München nung Netherlands aser Romania na round of 16 asaya Netherlands-i goal 3-0 agi kokogo.

Asaya nung Netherlands atema C. Gakpo-i minute 20 nung mezüngbuba goal idaktsü aser iba sülen D. Malen-i minute 83 aser 90'+3 nung goal ana idakja parnoki asaya koka liasü.

Asaya nung goal ana idaktsüba sülen D. Malen ya taküm iba asayamung nung asaya ka nung goal ana idaktsüba mezüngbuba asayar kümogo.

Quarterfinals nung Netherlands pur Turkey mesüra Austria na rongnung ka den asayatsü.

Kasa asayamung round of 16 nung Portugal aser Slovenia

na asaya atakzuka aliba mapang aser mapang talila apuloktsür asayaba mapang tashi nunga telok kati danga goal midaktsütetba sülen penalty metsütep aser Portugal-i asaya koka liasü.

Asaya nung Portugal team nem penalty metsütsü atema maong ka agütsü, ajisüaka captain Cristiano Ronaldo-i metsüba ball Slovenia goalkeeper Oblak-i kanga junga nokdanga liasü. Iba penalty idaktsü asübo par team quarter-finals-i ayong ayonga aitsü liasü.

Ajisüaka asaya nung Portugal atema goalkeeper Diego Costa-i kanga junga asaya-a par team takok dangi ani.

Portuguese goalkeeper yagi mezüng Slovenia Benjamin Šeško-i ball ka pa kijai bener aluba kanga junga nokdang, aser iba sülen penalty

metsütepba mapanga goal asem tashi kümzuka liasü.

Maneni asaya mezüngbuba shilem tembangtsü lia Leipzig striker Benjamin Sesko-i box kümbang nungi metsüba ball ka Porto goalkeeper yagi kanga junga nokdanga liasü.

Asayaba mapang penalty midaktsütetaka tie-breaker asayaba mapangbo Cristiano Ronaldo-i Portugal atema mezüngbuba penalty metsü aser kanga junga idakja liasü.

Penalty metsütepba mapang Slovenia pur mezüng metsü aser parnok rongnungi Josip Ilicic-i metsüba ball Diogo Costa-i nokdanga liasü. Iba sülen ano Jure Balkovec aser Benjamin Verbic nati metsüba penalty-a Costa-i nokdanga par team nem takok agütsü.

Portugal team July 6 nü quarterfinal France den asayatsü.

Mohun Bagan Super Giant-i defender Tom Aldred den tenangzüktep yanglu



Chiteni/July 2, 2024 (Agencies): ISL club Mohun Bagan Super Giant FC-i, taruba ISL metenzük tsüngda sangdong ka ajanga Australia nung asayar Tom Aldred den tenangzüktepba ka yangluba sangdongogo.

Arishi küm 32 tain defender ya club nung adenba ajanga Kolkata giants pur back line tali tashi taitba akümtsü.

"Ni Mohun Bagan Super Giant FC nung adenba atema kanga pelar. Green aser maroon jersey asemtsü ya maongka ka asütsü aser ni asayatsü yongyasetar," ta Aldred-i ashi.

Tom Aldred ya asayar tejen ka aser tajangshiba aika bena aliba asayar ka lir, anungji pa team nung adenba ajanga defensive unit tali tashi taitba akümtsü.

"Ni England, Scotland, Australia nung asayaogo aser tang India nung asayatsü. Ni iba ISL club nung den jenjang tasenka agütsü aser Asian Champions League asayatsü aser team toktepa asayatsü aser takok atema teyari agütsütsü yongyasetar," ta Aldred-isa shisem.

Aldred-isa, club indang fan

temi club ajungmesoba indang pai meteta lir ta ashiba den club takok asoshi bendanga agüja inyaktsü tenangzükba agüja liasü.

"Ni Mohun Bagan puti otsü indang kanga junga meteta lir aser ni panoki tawa takok anguba kar talang nungi repringogo. Ni anogoshia Mohun Bagan tenung nungi takokba tashi tajungtiba asayatsü merangtsü. Ni meranga inyaktsü aser club, fan tem aser kü teammate tem takok asoshi teyari agütsütsü," ta pai ashi.

"Ni India aser Kolkata-ia arua ajak den ajuruteptsü yongyasetar. Nenok ajak den takaraba nung ajuruteptsü imlar atar," ta Aldred-i shisem.

Kasa mapang nung Mohun Bagan Super Giant head coach Jose Molina-i, "Team defence akangshitsü atema Tom Aldred ya asayar tejen ka lir. Pa asojen tajung, tashi ita asayaba asayar ka aser defence nung kanga aggressive lir," ta ashi.

"Anüing nung asayaba ball Tom-i amokbanger asyatsü aser asaya build-up asütsü atema pai tasa tajung bena lir," ta coach-i ashi.

Andy Murray Wimbledon kija asaya nung masayatsü



Chiteni/July 2, 2024 (Agencies): Andy Murray surgery agiba mapang shitak nung taneptsü mongutetba sülen Wimbledon tebur kija asaya nung shilem magütsü telemtetba agiogo.

Pa kija asaya mezüngbuba Mongolbarnü asayatsü liasü, saka tang iba telemtetba ya agiogo, ajisüaka pa tarep asaya nungbo tenu Jamie den asayatsü renema lir.

Arishi küm 37 tain asayar, shibai 2013 aser 2016 küm iba asayamung kokogo, pa mezüngbuba round nung asayamung tenzüker tananübuba Centre Court nung Czech nung asayar Tomas Machac den asayatsü liasü.

"Hopta ka tejakdang operation agir mapang shitak nung taneptsü angütsü atema kanga meranga inyakaka tia maka Andy-i taküm tebur kija

asaya nung shilem magütsü atema telemtetba agütsü aküm," ta Murray indang representatives-i sangdong ka ajanga metetdaksü.

"Nenoki meteta lir pa kanga tezüadnger, saka pa tebur tarep asaya nungbo Jamie den külemi asayatsü renema aliba jangjashitsüogo aser Wimbledon nung taküm tatembangbuba asayatsü yongya atadar," ta paisa metetdaksü.

Taoba mapang world No. 1 British nung asayar, shiba hip nung metal ka inoker asayar, pa taoba ita Queen's asayamung asayaba mapang tetsüng tachichilen timtem aliba ajangashiba sülen operation agütsü aküm.

Iba sülen anogo ishika lir pa spinal cyst ka intoktsü atema surgery agia liasü.

Murray aser pa tenu Jamie na nem taoba hopta All England Club-i, Wimbledon tebur tarep asaya nung asayatsü atema tatembangbuba wildcard agüja liasü.

Andy Murray Paris Olympics nunga shilem agütsü sentong lir, koba pa indang career nung tatembangbuba asaya asütsü.

Murray-i iba telemtetba agiba sülen pa melena mezüngbuba round nung asayatsü asoshi Belgium nung David Goffin nem maongka agütsüogo, shiba qualifying asaya nungi lucky loser ka lir.

Zimbabwe den asaya atema Sudharsan, Jitesh & Harshit nung shimogo

Chiteni/July 2, 2024 (Agencies): India tebur team selection committee-i Zimbabwe den mezüngbuba T20 asaya ana atema Sanju Samson, Shivam Dube aser Yashasvi Jaiswal nung melena opener Sai Sudharsan, wicketkeeper-batsman Jitesh Sharma aser pacer Harshit Rana nung shimogo.

Harshit Rana tang mezüngbuba India team nungi asayatsü atema shimogo, shibai Kolkata Knight Riders nungi taoba IPL kanga junga asayaogo.

Sanju Samson, Shivam Dube aser Yashasvi Jaiswal nung Zimbabwe den asayatsü aliba team nung züngoksemer liasü, saka parnok tamasa ICC T20 World Cup akokba team den India-i arütsü aser iba sülen Harare-i aotsü. Iba asayamung

ya July 6 nü tenzütsü.

Maneni iba asayamung atema Abhishek Sharma, Dhruv Jurel, Riyan Parag aser Tushar Deshpande nungera tang mezüngbuba India team nung züngoksemogo. All-rounder Nitish Kumar Reddy shiba mezüng sangdongba team nungbo liasü, pa yiruba ajanga masayatetsüsa kümogo aser pa melen BCCI-i Dube shimogo.

Rahul Dravid maliba mapang VVS Laxman team den Zimbabwe-i aotsü. Asayamung nung asaya ponguprongla Harare Sports Club, Harare nung asayatsü.

1 aser 2buba T20I asaya atema India squad: Shubman Gill (Captain), Ruturaj

Gaikwad, Abhishek Sharma, Rinku Singh, Dhruv Jurel (WK), Riyan Parag, Washington Sundar, Ravi Bishnoi, Avesh Khan, Khaleel Ahmed, Mukesh Kumar, Tushar Deshpande, Sai Sudharsan, Jitesh Sharma (WK), Harshit Rana.

Zimbabwe squad: Sikandar Raza (captain), Faraz Akram, Brian Bennett, Johnathan Campbell, Tendai Chatara, Luke Jongwe, Innocent Kaia, Clive Madande, Wessly Madhevere, Tadiwanashe Marumani, Wellington Masakadza, Brandon Mavuta, Blessing Muzarabani, Dion Myers, Antum Naqvi, Richard Ngarava, Milton Shumba.

BILEMDANGANG

"Shilem agir melira takoker mejangjar."